

Bosna i Hercegovina  
Federacija Bosne i Hercegovine  
**Hercegovačko-neretvanski kanton**  
**SKUPŠTINA**  
Broj: **02-01-XI-070/21**  
Mostar, 26.02.2021. godine

**IZVOD IZ ZAPISNIKA**  
**sa jedanaeste (XI.) redovne sjednice Skupštine**  
**Hercegovačko-neretvanskog kantona**

Sjednica je održana dana 26.02.2021. godine u Sali Centra za kulturu u Mostaru sa početkom rada u 13:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

**Prisutni:** Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Mejrima Hasić, Nevenko Herceg, Julineta Jurić, Vera Konjevod, Tomislav Martinović, Irma Memidžan, Ivan Odak, Andrea Pehar, Milica Pehar, Amir Šelo, Šerif Špago, Alisa Hajdarović, Minela Krpo, Nermin Vrtić, Aner Žuljević, Iva Raguž, Vesna Saradžić, Zora Dujmović, Selma Drljević i Đuro Prkačin, Edis Džino i Ismet Lulić.

**Odsutni:** Ajdin Teleteović i Slaven Raguž.

Konstatovano je da je na sjednici prisutno **28** poslanika, te da postoji kvorum za rad i punovažno odlučivanje.

**Prisutni po pozivu:** predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu dnevnoga reda.

U raspravi nije nitko učestvovao.

Obavljeno je glasanje da se Prijedlog Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“ razmatra po skraćenom postupku.

Većinom glasova „Za“, uz 1 „Protiv“ glas, Skupština je prihvatila prijedlog da se Prijedlog Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“ razmatra po skraćenom postupku.

Obavljeno je glasanje po prijedlogu dnevnoga reda.

Nakon glasanja konstatovano je da je jednoglasno usvojen dnevni red jedanaeste redovne sjednice Skupštine HNK.

## Usvojeni Dnevni red:

1. Poslanička pitanja;
2. Prijedlog Prostornog plana HNK s prijedlogom odluka;
3. Prijedlog Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“ (skraćeni postupak);
4. Izvještaj Komisije Vlade HNK za upravljanje Stabilizacijskim fondom i utvrđivanje Prijedloga Programa utroška sredstava od subvencija iz člana 3. i 4. Zakona o ublažavanju negativnih ekonomskih posljedica izazvanih epidemijom korona virusa (COVID-19) i podrški ekonomiji na području HNK;
5. Izvještaj o izvršenju Zaključka Skupštine HNK broj: 02-01-X-014/21 od 26.01.2021. godine;
6. Informacija Ministarstva privrede o realizaciji ugovora o koncesijama za 2019. godine;
7. Informacija Ministarstva poljoprivrede, šumarstva i vodoprivrede o stanju u poljoprivredi na području HNK;
8. Informacija Ministarstva poljoprivrede, šumarstva i vodoprivrede o realizaciji dodijeljenih koncesija i ugovora o zakupu za korištenje poljoprivrednog zemljišta u državnom vlasništvu na području HNK zaključno sa 31.12.2019. godine.

### AD 1. Poslanička pitanja

#### Julineta Jurić:

Poštovane kolegice i kolege, sve vas zajedno pozdravljam, kao i nazočne predstavnike medija. Za današnju sjednicu skupštine imam dva zastupnička pitanja, za Ministarstvo prosvjete, znanosti, kulture i športa HNŽ-a, za ministra gospodina Rašida Hadžovića. Na sjednici od 31. siječnja 2020. godine postavila sam zastupničko pitanje kada ćete donijeti program predškolskog odgoja i obrazovanja obavezan za svu djecu predškolskog uzrasta pred polazak u osnovnu školu. U odgovoru ste naveli da je rad na izradi programa i novog zakona o predškolskom odgoju i obrazovanju u tijeku, sa planom finalnih aktivnosti u tekućem kvartalu godine. Pošto je ovo 2021. godina ponavljam svoje zastupničko pitanje, Okvirni zakon o predškolskom obrazovanju donesen je 2007. godine i do danas pored Zapadnohercegovačke županije mi smo jedina županija u BiH koja nije uskladila Zakon o predškolskom obrazovanju sa Okvirnim zakonom, kod nas je još uvijek na snazi zakon iz 2000. godine. Jeli moguće da samo u našoj županiji djeca ne pohađaju obavezan predškolski program koji je Okvirnim zakonom obavezujući? Moje pitanje glasi: kada će se ponuditi na usvajanje Zakon o predškolskom odgoju i obrazovanju te donijeti podzakonski akti koji trebaju pratiti zakon i temeljiti se na zajedničkoj jezgri cjelovitih razvojnih programa za predškolski odgoj koja je na razini BiH donesena 2018. godine?

Drugo pitanje. Zakon o osnovnom odgoju i obrazovanju koji je donesen 2000. godine, uključujući izmjene i dopune iz 2004., 2005., 2014. i 2016. godine, zakonom i podzakonskim aktima nije propisano izvođenje online nastave i nastave na daljinu. Suočeni sa takvim oblikom odvijanja nastavnog procesa zbog okolnosti izazvane pandemijom COVID-19 dovodi se u pitanje zakonitost obrazovanja. Zakon o srednjoškolskom odgoju i obrazovanju također ne sadrži obveze vezane za odvijanje online nastave. Kad će zakonski biti reguliran ovakav oblik nastave?

Imam jednu inicijativu, isto za Ministarstvo prosvjete, znanosti, kulture i športa HNŽ-a, inicijativa stalni radni odnos u obrazovanju. Svi djelatnici u obrazovanju koji rade na određeno vrijeme na 3 i više godina te uzastopno potpisuju ugovor sa poslodavcem obaveza primanja na neodređeno vrijeme stalni radni odnos. Postaviti jasan zakonski okvir oko primanja djelatnika

za stalno jer postoje djelatnici koji rade preko 10 godina na određeno vrijeme, a cijeli period imaju punu normu.

**Elvedin Grcić:**

Zahvaljujem predsjedavajući. Dobar dan želim kolegicama, kolegama i svim prisutnima. Povod za moje poslaničko pitanje je inicijativa koju je imao Klub zastupnika Bošnjaka, naime razmatrajući ovog proteklog perioda inicijativu i određene odluke o izmještanju sjedišta ministarstva za pitanja boraca van administrativnog sjedišta grada Mostara nas je potaklo. Ali evo u međuvremenu imamo i dodatno neke informacije, mada zvanično kao zastupnici u Skupštini nismo upoznati i ovom prilikom postavljam poslaničko pitanje, upućeno ministarstvu za pitanja boraca i resornom ministru. Znači tražimo informaciju vezanu za sve podnešene aktivnosti, kao i razloge za potrebu ovakvih odluka o preseljenju i izmještanju sjedišta ovog ministarstva. Obzirom da evo svi znamo da je riječ o jednoj ranjivoj populaciji, kojima treba osigurati da kažem određene i uslove, ali trebamo poštivati i određene zakonske odredbe koje regulišu ova pitanja. Hvala.

**Amir Šelo:**

Pozdravljam sve prisutne, pozdravljam uvažene članove Vlade, cijenjene goste, predstavnike medija. Moja poslanička inicijativa se tiče određenog broja naših zaposlenih u kantonu koji su bolesni. Navedeno pitanje sam bio delegirao ovako neformalno pojedinim članovima Vlade, međutim vidim nema odgovora, pa sam se odlučio uputit ovu poslaničku inicijativu i nadam se da će ona biti ispoštovana pošto se radi o manjem broju zaposlenih našega kantona. Upućujem poslaničku inicijativu Ministarstvu finansija HNK-a, Uredu predsjednika Vlade HNK-a i Pravobranilaštvu HNK-a. „Poštovani, pokrećem poslaničku inicijativu da se zaposlenicima kantona koji su potpisali ugovore o vansudskoj nagodbi i odrekli se kamata, osigura do 15.03.2021. isplata navedenih sredstava ukoliko lično imaju zdravstvenih problema. Molim da spisak navedenih lica osigura Pravobranilaštvo HNK-a po osnovu dostavljene medicinske dokumentacije.“ Zamolio bi članove Vlade da ovo ispoštuju jer idući put ću ovo pitanje delegirati kao zaključak i tražit ću da Skupština obaveže Vladu da se ovo pitanje riješi. Toliko od mene.

**Ismet Lulić:**

Evo pozdravljam i ja sve prisutne. Ja imam jedno zastupničko pitanje i jednu inicijativu. Znači što se tiče pitanja, dobio sam informaciju da je savjetnik federalnog ministra postavljen na mjesto vršioca dužnosti sekretara Ureda za zakonodavstvo Vlade. Ako sam dobro upratio i ranije na sličan način postavljen je vršilac dužnosti šefa kabineta Ureda predsjednika Vlade, pa je nakon toga raspisan javni konkurs. Ovim putem postavljam poslaničko pitanje predsjedniku Vlade, na način da tražim da upozna Skupštinu sa načinom imenovanja vršioca dužnosti rukovodećih državnih službenika u organima HNK-a. Na osnovu kojeg propisa se vrše ova imenovanja, a posebno jer su na ova mjesta postavljeni savjetnici nosilaca izvršnih funkcija koji statusom nisu državni službenici?

I moja inicijativa jeste, znači poslanička inicijativa, preuzimanje Zakona o državnoj službi F BiH i Zakona o plaćama i naknadama u organima vlasti F BiH, kao kantonalni propis. Znači na osnovu člana 104 o radu Skupštine HNK-a podnosim zastupničku inicijativu prema Skupštini, u kojoj predlažem da Skupština donese zaključak kojim se obavezuje Vlada HNK-a i Ured predsjednika Vlade, da u roku od 60 dana od dana usvajanja zaključka pripremi prijedlog zakona o preuzimanju Zakona o državnoj službi u F BiH i prijedlog zakona o preuzimanju

Zakona o plaćama i naknadama u organima vlasti F BiH, kao kantonalnih propisa u HNK-a i navedene dostave Skupštini na usvajanje. Hvala.

**Ivan Odak:**

Dobro, nikakav problem. Predlažem Vladi HNŽ-a da u korespondenciji sa višim razinama vlasti, sa Vladom F BiH, utvrdi dokle se stiglo sa nabavom cjepiva za BiH. Očekujem od Vlade proaktivniju ulogu u rješavanju u ovom trenutku najtežeg i najizazovnijeg problema u BiH. Vjerujem da smo svi svjesni opasnosti od virusa u kojoj se svi nalazimo, stoga predlažem Vladi da u što kraćem roku iscrpi razgovore sa višim razinama vladi, te ako isti nemaju plan i viziju kako osigurati cijepljenje i imunizaciju građana BiH predlažem Vladi HNŽ-a da sama krene u nabavu i cijepljenje žitelja HNŽ-a.

Drugo poslaničko pitanje. Premijeru, nije tu trenutno, gospodine Nevenko Herceg, zamolio bih vas da mi odgovorite, kada će nakon punih 12 godina Zakon o šumama HNŽ-a konačno ugledati svjetlo dana? Obrazloženje: nakon niza upita i inicijative za održavanje tematske sjednice o stanju u šumama HNŽ-a, naše zastupničko pitanje na posljednjoj sjednici skupštine koja je održana 26.01.2021. upućeno ministru gospodinu Donki Joviću, dobili smo odgovor iz Ministarstva poljoprivrede, šumarstva i vodoprivrede HNŽ-a, da je to isto ministarstvo pripremlilo Prijedlog Zakona o šumama HNŽ i u ZAK broj 11-06-22-154-1/21 prosljedilo ga Vladi HNŽ u daljnju proceduru. Hvala lijepa.

**Marija Bešker:**

Sve vas skupa pozdravljam. Imam dva zastupnička pitanja. Dakle, svjesni surovosti društva u kojem živimo, naročito mi u BiH, u našem okruženju žive mnogi naši sugrađani sa posebnim potrebama, za koje se bojim da ih nikada nismo prepoznali ili jesmo u vrlo maloj mjeri i omogućili im integraciju u društvo, omogućili im jednak status u odnosu na one koji su potpuno zdravi i nemaju invaliditete. Bojim se da osobe sa invaliditetom nisu ne samo ravnopravne već su i u potpunosti zapostavljene i žive na marginama društva. Stoga danas sa ove skupštinske govornice tražim od Vlade HNŽ informaciju o zastupljenosti u radnim mjestima u organima uprave HNŽ-a osoba sa invaliditetom i strah me je da je zakon o profesionalnoj rehabilitaciji, osposobljavanju i zapošljavanju osoba sa invaliditetom samo mrtvo slovo na papiru. Stoga u traženju od Vlade da dostavi popis uposlenih osoba sa invaliditetom predlažem nam svima, a naročito vama najodgovornijima, ako smo već propustili toliko godina, da danas podvučemo crtu, te da osobe sa invaliditetom budu prioritet jer to su naša djeca, naši roditelji, obitelji, naši sugrađani i naši prijatelji. I molim za analizu upošljavanja osoba sa invaliditetom u HNŽ-u.

I drugo zastupničko pitanje. Zašto se ne objavljuju Službene novine HNŽ-a u elektronskom obliku? Mislim da to rade sve općine i druge županije. hvala.

**Aner Žuljević:**

Zahvaljujem predsjedniče. Pošto se prvi put javljam, da pozdravim sve u sali. Moje prvo pitanje ide prema ministarstvima koji su vršili raspodjelu budžetskih sredstava u vidu poticaja, da mi se dostavi program utroška, uz odgovarajuće mišljenje resornog ministarstva finansija, javni poziv, način evaluacije prijava, izvještaj o radu komisije i odluka o dodijeli sredstava, s obzirom da postoji informacije kako se između izvještaja o radu komisije i odluke Vlade dešavale naravno određene intervencije u smislu finansijskih iznosa i privrednih subjekata koji su dobivali te poticaje, pa da zbog javnosti čisto razjasnimo te potencijalne špekulacije. Druga stvar, ja molim još jednom premijera, a uz to dodajem novu molbu ministru finansija, da mi dostavi u zadnje tri godine isplate prema medijskim kućama po osnovu odluke koja je u

Službenom listu napisana na način u kojem se ne mogu utvrditi subjekti koji su primili novac. Ja mislim da je zakon vrlo jasan i da ne postoji uopšte potreba da jedni od drugih krijemo isplatu javnog novca građana kantona. Ne vidim nikako dobrim i da su medijske kuće prihvatile da budu dio ovakvog aranžmana u smislu primanja novca, očigledno postidjeni od onih koji se eventualno nisu našli na tom spisku. Ali ja mislim da je vrijeme da u protekle tri godine vidimo koje su to medijske kuće, na osnovu kojih kriterija dobile novac iz budžeta, pa da na kraju bar procijenimo dali adekvatno prate i rad Skupštine i rad Vlade, u smislu onoga što je informisanje javnosti.

I treća stvar, s obzirom da smo trenutno u polemici vezano za transfer jednog od ministarstva, a očigledno su ministri dugo tu pa su počeli nositi kući ministarstva, da se ne bi desilo da i ostali to pokrenu pa nose kućama, interesuje me, mi smo kupili tu zgradu, uzeli kredit, platili to tamo, već na način kako smo platili, ja bi zamolio da mi se dostavi koliko u ovom momentu pošto tamo postoji naravno i objektivno obrazloženje ministra zašto je to pokušao da prebaci dole u smislu uštede finansijskih sredstava, da mi vidimo koliko u ovom momentu budžet našeg kantona plaća zakupa za one institucije za koje je Vlada planirala da ih smjesti u taj prostor koji smo kupili, konkretno hotel Ero. Znači ako ima ta neka kalkulacija u smislu finansijskog iznosa kirija na rashodovnoj strani budžeta, da mi se dostavi. Eto toliko. Zahvaljujem.

#### **Oliver Soldo, ministar za pitanja branitelja/boraca HNŽ/K:**

Uvaženi zastupnici, predsjedništvo, Vlada, svi nazočni i gosti. Tema se je toliko podigla zato ću kratko samo odgovoriti jer nije vrijedna tema toliko ovaj žuci koja se prosula ovih dana. Pisano će kolega dobit detaljno izvješće što smo sve uradili. Znači ministarstvo nijednim dijelom nije prekršilo nijednu proceduru, već 4, 5 godina tražim povoljnije rješenje za ministarstvo branitelja jer svi oni koji su dolazili u ministarstvo branitelja znaju da ministar parkira u parteru na sred dvorišta jer ministarstvo ima 3 parking mjesta, ali je nemoguća misija da dobijemo za službena vozila i za naše goste znači da ta 3 mjesta budu slobodna i to je borba već 7 godina kako sam ja tamo. Znači sa poslodavcem svojim sam u više navrata obavljao razgovore službene, 28. siječnja prošle godine sazvaio sam gospodina Dedovića iz Službe za statistiku HNŽ-a, Faruk Gosto iz Federalne televizije, tu je sad i NI i moj poslodavac gdje smo inzistirali da se mirujući promet riješi i da se učini dignitet pristupa institucijama koje obitavaju i rade u tim zgradama. Nažalost, godinu dana je prošlo, apsolutno ništa se nije desilo i moj poslodavac nažalost izgleda da nije zainteresiran da riješi taj dio. Prije dvije i po godine sam inzistirao evo upravo na ovom danas vijećničkom pitanju, da se uradi rampa jer ministarstvo branitelja nema pristup invalidnim osobama, urađena je rampa kojom se ne može ispet nijedan branitelj koji je u kolicima. Znači imamo objektivni problem već 7 godina, koliko sam ja tamo, a pokušavao sam ga aktivno, proaktivno riješiti, uputio sam prošle godine u veljači Odjelu urbanizma grada Mostara dopis da nam urade urbanistički projekt rješenja tog mirujućeg prometa i zaštite parking mjesta na tom dijelu i normalno to bi izveli ovi investitori koji su moji poslodavci. Nažalost, opet se ništa nije uradilo. U zadnjem kvartalu prošle godine sam pokrenuo inicijativu u duhu politike Vlade evo na temelju ovog zadnjeg pitanja koje je bilo zastupničko danas, jer je politika Vlade bila da previše ne trošimo javnog novca u privatni sektor kroz zakup, a dobit ćete informaciju pa će vam bit jasno o čemu se radi. Znači na temelju toga sam zatražio od grada Mostara službeno da mi ustupe prostor koji je adekvatan uvjetima i normalno da smo im mi postavili uvjete koji nam trebaju, grad Mostar je kao jedinu lokaciju ponudio zgradu na Buni. Ja osobno sam bio u dilemi pošto sam sa Bune i nije to nošenje ministarstva kući, meni je to opterećenje osobno, osobno opterećenje.

Samo ću još dva tehnička podatka i završiti ću. Znači ta procedura je u cjelosti ispoštovana, znači u cijelosti zakonski ispoštovana i kolegi ću dostaviti to napismeno, sa pratećim dokumentima, a ono što ću vam reći, za 7 godina skoro boravka u sadašnjem poslodavca cirka

450.000 KM je koštala moja kirija, a po uvjetima koje sam dogovorio sa gradom Mostarom za tih 7 godina da sam proboravio u tom prostoru kirija bi mi bila 135.000 KM. Znači to je po meni uz ove barijere tehničke ključno, s tim da na Buni dobivam i 15 parking mjesta. Još jednu stvar, evo dužan sam i to reć, na vladi koja je bila, prije pola sata završila, sam predsjedniku Vlade i ministrima rekao, da meni Buna nije problem, znači rekao sam zamrznut ću na 15 dana, rok mi ističe zakupa kojeg ja produžavam desetim aneksom 10.04., meni nije problem 15 dana ću zamrznut rješavanje ovoga ugovora koji sam potpisao legalno, ali nek mi Vlada nađe smještaj adekvatan negdje u krugu grada. Ako vi mislite da je grad jedino gdje se mi možemo smjestiti nađite mi adekvatan smještaj, ja ostajem tu u gradu i samo tražim uvjete za funkcioniranje, ništa više. Hvala velika.

### **Šerif Špago:**

Neću dozvoliti raspravu, ministar je zloupotrijebio ono što sam mu omogućio da iznese, ovdje bi se milijon pitanja otvorilo ministre, vi znate kako je nastalo ministarstvo za boračka pitanja i ja bi volio da mi pričamo o zakonu o dopunskim pravima i obavezama, da smo jedini kanton koji nije obezbjedio za one od 55 i 56 godina da primaju primanja, a ne gdje će biti sjedište državnih službenika i ministra. Zaključujemo raspravu po prvoj tački. Imate mogućnost da odgovorite u informaciji.

### **AD 2. Prijedlog Prostornog plana HNK s prijedlogom odluka**

Obrazloženje su dali Suad Hasandedić ministar građenja i prostornog uređenja HNK, gospodin Jaroslav Vego i gospodin Krešimir Šaravanja.

Otvorena je rasprava.

U raspravi su učestvovali: Amir Šelo, Đuro Prkačin, Tomislav Martinović, Alisa Hajdarović, Suad Hasandedić i ministar građenja i prostornog uređenja HNK.

Obavljeno je glasanje o **Prijedlogu Odluke o izmjenama Odluke o pristupanju izradi Prostornog plana HNK-a za period 2012.-2022.**

Nakon glasanja konstatovano je da je Prijedlog navedene Odluke jednoglasno usvojen.

Obavljeno je glasanje o **Odluci o usvajanju Prostornog plana HNK-a.**

Nakon glasanja konstatovano je da je navedena Odluka jednoglasno usvojena.

Obavljeno je glasanje o **Odluci o provođenju Prostornog plana HNK-a sa tehničkim izmjenama i dopunama.**

Nakon glasanja konstatovano je da je navedena Odluka jednoglasno usvojena.

### **AD 3. Prijedlog Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“ (skraćeni postupak)**

Obrazloženje je dala Stana Burić zastupnica u Skupštini HNK.

Otvorena je rasprava.

U raspravi su učestvovali: Alisa Hajdarović, Stana Burić, Tomislav Martinović, Šerif Špago i Nevenko Herceg.

Obavljeno je glasanje o **Prijedlogu Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“.**

Većinom glasova „Za“, uz 4 „Suzdržana“ glasa usvojen je Prijedlog Zakona o proglašenju područja špilje Vjetrenica s dijelom Popovog Polja Zaštićenim pejzažom „Vjetrenica – Popovo Polje“ uz određene tehničke ispravke.

Usljedila je pauza od 30 minuta.

**AD 4. Izvještaj Komisije Vlade HNK za upravljanje Stabilizacijskim fondom i utvrđivanje Prijedloga Programa utroška sredstava od subvencija iz člana 3. i 4. Zakona o ublažavanju negativnih ekonomskih posljedica izazvanih epidemijom korona virusa (COVID-19) i podrški ekonomiji na području HNK**

Obrazloženje je dao prof. dr. Damir Jerković, predsjednik iste komisije.

Otvorena je rasprava.

U raspravi su učestvovali: Aner Žuljević, Milica Pehar, Tomislav Martinović, Amir Šelo, Šerif Špago, Nevenko Herceg i Željko Laketić, ministar privrede u Vladi HNK.

Obavljeno je glasanje o predloženom zaključku.

Nakon glasanja konstatovano je da je Zaključak o primanju na znanje navedenog izvještaja Komisije Vlade jednoglasno usvojen.

**AD 5. Izvještaj o izvršenju Zaključka Skupštine HNK broj: 02-01-X-014/21 od 26.01.2021. godine**

Obrazloženje je dao Šerif Špago predsjedavajući Skupštine HNK.

Otvorena je rasprava.

U raspravi su učestvovali: Tomislav Martinović, Nevenko Herceg, Amir Šelo, Damir Džeba, Stana Burić i Šerif Špago.

**AD 6. Informacija Ministarstva privrede o realizaciji ugovora o koncesijama za 2019. godine**

Obrazloženje je dao Željko Laketić, ministar privrede u Vladi HNK.

Otvorena je rasprava.

U raspravi su učestvovali: Šerif Špago, Ivan Odak, ministar Željko Laketić i Donko Jović ministar poljoprivrede, šumarstva i vodoprivrede u Vladi HNK.

Obavljeno je glasanje o predloženom zaključku.

Nakon glasanja konstatovano je da je Zaključak o primanju na znanje Informacije Ministarstva privrede jednoglasno usvojen.

**AD 7. Informacija Ministarstva poljoprivrede, šumarstva i vodoprivrede o stanju u poljoprivredi na području HNK**

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi su učestvovali: Amir Šelo, Đuro Prkačin, ministar Donko Jović i Šerif Špago. Zastupnik Amir Šelo predložio je slijedeći Zaključak:

**„Skupština HNK predlaže da Gradsko vijeće Grada Mostara u roku od 6 mjeseci donese Program gospodarenja poljoprivrednim zemljištem u državnom vlasništvu za područje Grada Mostara.**

**Zaključak će se dostaviti Gradskom vijeću Grada Mostara. Zaključak stupa na snagu danom donošenja i objavit će se u Službenim novinama.“**

Obavljeno je glasanje o navedenoj Informaciji.

Nakon glasanja konstatovano je da je navedena Informacija primljena k znanju.

Obavljeno je glasanje o predloženom Zaključku zastupnika Amira Šele.

Nakon glasanja konstatovano je da je navedeni Zaključak jednoglasno usvojen.

**AD 8. Informacija Ministarstva poljoprivrede, šumarstva i vodoprivrede o realizaciji dodijeljenih koncesija i ugovora o zakupu za korištenje poljoprivrednog zemljišta u državnom vlasništvu na području HNK zaključno sa 31.12.2019. godine**

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi nije nitko učestvovao.

Obavljeno je glasanje o navedenoj Informaciji.

Nakon glasanja konstatovano je da je Informacija jednoglasno primljena k znanju.

Sjednica je završena u 17:30 sati.

Zapisničar  
Dario Topić

Predsjedavajući  
Šerif Špago